

**Տ. ՎԱՐԴԱՆ ԵՊԻՍԿՈՊՈՍ ՆԱՎԱՍԱՐԴՅԱՆԻ ՔԱՐՈՉԸ՝
ԽՈՍՎԱԾ Ս. ԷԶՄԻԱԾԻ ՍԱՅՐ ՏԱՃԱՐՈՒԲ ՓԱՍՏՅԱՆ ԿԻՐԱԿԻՆ ՍԱՏՈՒՅՎԱԾ
Ս. ՊԱՏԱՐԱԳԻՆ**

(18 մարտի 2018 թ.)

Յանուն Հօր եւ Որդւոյ եւ Հոգւոյն Սրբոյ. ամէն:

*«Ապաշխարեցէք, զի մերձեալ է
արքայութիւն երկնից» (Մատթ. Գ. 2-3):*

Սիրելի՛ հավատացյալ քույրեր եւ եղբայրներ,

Հայաստանյայց Առաքելական Եկեղեցու ծիսական կարգավորութեան համաձայն՝ արդեն շաբաթներ շարունակ խորհրդածում ենք մեր անձի, կյանքի, մեր եւ Աստուծո հարաբերութեան հարցերի շուրջ: Քայլում ենք ապաշխարութեան ճանապարհով, փորձում մեր կյանքի ընթացքը զուգորդել Աստվածաշնչյան պատգամներին, պատվիրաններին, Աստուծո խոսքին: Մեր անձերը ինքնաքննութեան ենթարկելով՝ փորձում ենք այնտեղ հայտնաբերել մեր սխալներն ու սայթաքումները, Աստուծո խոսքին անհազանդ գտնվելու դիտավորութիւնը՝ մեղքը, փորձում ենք ջանք գործադրել՝ ազատվելու մեղքի այդ կապանքներից: Արարիչ Աստված մարդուն ստեղծեց իր հավիտենական երանութեան եւ իր ազատութեան շնորհների մեջ՝ տալով նրան նաեւ հնազանդութեան սահման, սակայն մարդն անհնազանդութեամբ մերժեց Աստուծո հետ հավիտենական լինելիութիւնը: Ինչպես որ մենք առօրյայում ընտրութեան առջեւ ենք՝ անցողիկ եւ անժամանակ, ժամանակավոր եւ հավիտենական արժեքների միջեւ, ադամական էութեամբ օժտված լինելով, հաճախ սայթաքում ենք մարդկային մեր կարողութիւններով եւ Աստծուն հեռացնում մեզնից. մեղքը զորացնում ենք մեր կյանքում եւ մեր ընթացքով խաթարում մարդկային ու աստվածային էութեան հաշտութիւնը: Հին Կտակարանում Աստված խոսում է բազում ընտրյալների, արդարների, մարգարեների միջոցով՝ ցույց տալով, որ Նա հարատեւ կանչում է եւ սպասում, որպեսզի մարդն անդրադառնա իր կյանքի ընթացքին եւ որպես այդ անդրադար-

ձումի արդյունք՝ վերականգնվի, վերակենդանանա, իր մեղքից ետ դառնա դեպի Հայր Աստծո հավիտենություն գիրկը: Աստված մեզ մշտապես հորդորում է, թե մեր կյանքը՝ այս երկրավոր ժամանակային ընթացքը, մեզ որպես տնտեսություն է տրված Աստուծո կողմից, որպեսզի մենք այն խնամենք, իմաստությամբ վարվենք եւ մեր կյանքի նյութական վաստակներից հոգեւոր գանձեր դիզենք երկնքի արքայության մեջ: Անշուշտ, մեր մեղսական ընթացքը վերականգնելի է, որովհետեւ այնպես, ինչպես մեղք գործելու, սայթաքելու կարողություն ունենք, այդպես էլ հնարավորություն ունենք վերականգնվել այդ մեղքից, վերահաստատել մեր եւ Աստուծո միջեւ առողջ հոգեւոր հաղորդակցությունը՝ աղոթքի միջոցով, որպեսզի Ս. Գրքի ընթերցանությամբ ու աստվածաճանաչությամբ մեր հոգին, ներքին էությունը զորացնելու ճանապարհով մաքրենք մեր խիղճը, որ հանապազ պայքարի մեջ լինելով մտքի հետ՝ կարողանա հաղթել եւ մեր կյանքի ընտրությունը միշտ ուղղել դեպի մեր Տեր եւ Փրկիչ Հիսուս Քրիստոսի կողմը:

Այսօր Մեծի պահոց ապաշխարության այս շրջանի վեցերորդ կիրակին է, որ մեր Եկեղեցին անվանում է Գալստյան կիրակի: Օրվա խորհրդում ամփոփվել է մեր հավատքի գործությունը, որովհետեւ այս երկրավոր կյանքում եթե չգտնենք Աստուծո արքայությունը, եթե ժամանակների մի հատվածում չճանաչենք Աստուծո սիրո հայտնությունը, եթե այդ ճանաչողությամբ չընդունենք Քրիստոսին մեր կյանքի մեջ, եթե չապրենք Քրիստոսի հավիտենական փրկության գործությամբ, եթե չճանաչենք Քրիստոսի ծննդյան եւ խաղաղության ավետիսը եւ մեր մարդկային հարաբերությունների մեջ անհաշտությունը չչտկենք, չենք կարողանա սպասել աշխարհի վախճանին՝ Տիրոջ երկրորդ գալուստին:

Ուստի այսօր, սիրելի՛ հավատացյալներ, մեր Եկեղեցին մեզ հրավիրում է՝ մեր հավատքը նորոգելու: Սակայն այս օրը՝ Գալստյան կիրակիին, մենք ի՞նչ պատգամ ունենք ստանալու Քրիստոսի մարմինը հանդիսացող այս Եկեղեցուց, ինչպե՞ս ենք ճշգրտել հավատքը, մեր դիրքորոշումը Տիրոջ փրկչագործական խորհրդի հանդեպ, այսինքն՝ Տիրոջ հայտնության, Տիրոջ գալստյան ավետիսը ինչպե՞ս ենք ապրում մեր կյանքում, որովհետեւ մենք մեր երկրավոր կյանքում երբեք միայնակ չենք, Աստված մեզ երբեք միայնակ չի թողնում: Տերը մշտապես հայտնվում է բազում օրինակներով ու նշաններով, սակայն մեղքի շղարշով ծածկված մեր աչքերը, փակված երկրավոր կյանքի ցանկությունների հաճությամբ, հաճախ չեն տեսնում Տիրոջ հայտնության նշանները: Ուստի ապաշխարության

այս շրջանը մեր եւ Աստուծո հաշտության ու հաղորդակցության վերականգնման մեծագույն հնարավորությունն է, որպեսզի մենք մեր դիրքը ճշտենք Աստուծո հանդեպ, հավատքը նորոգենք: Բայց Տերը սպասում է, որպեսզի մենք մեր հավատքն ու կյանքը նորոգենք այնպես, ինչպես նա հայտնվեց եւ մեր մեղսական կյանքը առաջին գալստյամբ կենդանացրեց, մահվան ու մեղքի կապանքներից կյանքի կոչեց. այդ կանչով մենք միայնակ չենք եւ առանց Հիսուսի չենք կարող դիմավորել երկրորդ գալուստը: Եթե այսպիսի հնարավորությունները օգտագործենք մեր կյանքում եւ թոթափենք մեր կյանքի սխալները, վերականգնվենք Աստուծո ճշմարտության մեջ, մենք երբեք չենք վախենա Տիրոջ երկրորդ գալուստից, որովհետեւ գիտենք, որ այնժամ Տերը գալու է՝ դատելու արդարներին ու մեղավորներին, ու եթե մենք հավատքի մեջ զորավոր հույսով առատացած եւ սիրո գործերով ապրենք, ամեն օր կզգանք գալստյան ուժը:

Այսօր, սիրելի՛ հավատացյալներ, կողոսացիներին գրված իր նամակի մեջ Պողոս առաքյալը մեզ հորդորում է վերականգնվել. «Սպանեցե՛ք ուրեմն ձեր երկրավոր ցանկությունները. դե՛ն գեցեցեք պոռնկություն, պղծություն, հոռի կրքեր, չար ցանկություն եւ ագահություն, որ կռպաշտություն է: Դրա համար է, որ անհնազանդ որդիների վրա գալիս է Աստծու բարկությունը: Դուք էլ էիք մի ժամանակ ընթանում այդ մեղքերով, երբ ապրում էիք դրանց մեջ: Այժմ դուք եւս թոթափե՛ք այդ բոլորը՝ բարկություն, զայրույթ, չարություն, հայհոյանք եւ խեղդատակություն: Մի՛ ստեք միմյանց. հանե՛ք ձեր վրայից հին մարդուն եւ հագե՛ք նորը, այն, որ նորոգված է գիտությամբ՝ ըստ իր Արարչի պատկերի. այլեւս չկայ հրեա, ոչ էլ հեթանոս, թլփատություն եւ անթլփատություն, բարբարոս, սկյութացի, ծառա, ազատ, այլ՝ Քրիստոս, որ ամեն ինչ է ամեն բանի մեջ» (Կող. Գ. 5-11):

Ուրեմն, սիրելի՛ հավատացյալներ, եկեք այսօր աղոթքի միջոցով մեր հավատքը նորոգելով՝ խնդրենք Տիրոջը՝ ասելով, որ «Ես քեզ եմ ընտրում, ի՛մ փրկիչ Տեր Հիսուս Քրիստոս, եւ ինչպես մոլորյալներին դարձի բերեցիր, ինձ եւս չար սովորություններից ետ դարձրու, բարիք գործելու կարողություն՝ չնորհիր եւ իմ հոգու մեջ բեւեռի՛ր մահվան սոսկալի օրը, դժոխքի սարսափը եւ արքայության սերը, որպեսզի զղջամ մեղքերի համար եւ մշտապես արդարություն գործեմ: Ողորմիր տիեզերքի բոլոր արդար ու մեղավոր ծառաներիդ եւ վերջում նաեւ ինձ՝ բազմամեղիս» (Հմմտ. Ն. Շնորհալի). ամեն:

